



Namminersornerullutik Oqartussani, Kommuninilu nunatsinni tjenestemandit pillugit Inatsisartut Inatsisaata § 55-ip imm.1-ip allanngortinneqarnissaanut tunngasumik nalunaarusioqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut, taamaaliornikkut nunatsinni tjenestemandit, danskit naalagaaffiata nunatsinni tjenestemandinut malittarisassai malillugit tjenestemandisut soraarnerussutisiaqalersinnaaleqqullugit, taamaattorli tapeqartitsisoqassalluni soraarnerussutisiaqaataasussanit aningaasarsianinganiit %-mik aaliangersimasumik angissusilikkamik, taamaaliornikkut nunatsinni, qallunaat nunaannilu tjenestemandit soraarnerussutisiaqarnikkut assigiinngissutaasup nalimmassarneqarnissaa anguniarneqassalluni. Naligiinngissutaasoq nalimmassarniarlugu, tapeqaataasussap qanoq annertutiginissaa aammalu kommuninut, namminersorlutillu oqartussanut qanoq aningaasatigut naleqassanersoq nalunaarusiami UKA25 sioqqullugu tunniunneqartussami ersarissarneqassaaq. Tamatumuungattaq ilanngullugu nunatsinni qassit, tjenestemandinut isumaqatigiissut naapertorlugu atorfinitsinneqarsimanersut nalunaarusiami ersarissarneqassaaq.

Inatsisartunut Ilaasortaq, Peter Olsen, Inuit Ataqtigiit

Siullermeerneqarnera

Inatsisartunut ilaasortaq Peter Olsen Inuit Ataqtigiit sinnerlugit tjenestemandit pillugit nalunaarusiortoqarnissaanik siunnersuuteqarninnut qujassuteqarfigalugit imatut Naleqqamiit Naalakkersuisut peqqunneqarnissaanik inatsisartut aalajangiiffigisassaattut siunnersuummut oqaaseqaateqassaagut.

Nunatsinni tjenestemandinut taamatullu qallunaat nunaanni tjenestemandinut atugassarititaasut assigiinnginnerujussuartut ukiorpassuannngortuni eqqartorneqartuarsimasut ilagaat, maannalu siunnersuuteqartup pingasunngornermi junip tallimaani 2024, nal. 07.52 Sermitsiaq.ag-p nittartagaatigut saqqummiuneqartoq IMAK-ip misissugaa ¹ : Tjenestemandit Danmarkimut nuunermikkut aningaasarsiaqarnerulersinnaasut aallaavigalugit siunnersuut una saqqummiuppa

¹ [IMAK-ip misissugaa: Tjenestemandit Danmarkimut nuunermikkut aningaasarsiaqarnerulersinnaapput](#)



tassalu nunatsinni qassit tjenestemandinut isumaqatigiissut naaepertorlugu qassit atorfinitsinneqarsimanersut nalunaarusiorlugu ersarissaqqullugu.

Siunnersuuteqartumut Naalackersuisut akissutigisimasaat Naleqqamiit tupigusuutigeqaarput aammalu pissutsinut ilungersunartunut upperinnigatillusoq oqariartormata. Naalackersuisut, Inatsisartut IMAK nalunaarusiaanut pineqartumut eqqumaffigeqquneqartut arlaqarnerariarlugit nalunaarusiaq inuit arfinillit pillugit paasissutissat tunngavigalugit suliarineqarsimammat, misissuisimaneq atugassarititanik tamanik ersertitsisuunnginnerarpaat annertunnginnerarlugulu Naalackersuisut ilaatigut saqqummiiniarnerat maluginiagassaavoq.

Naalackersuisunaa - tjenestemandit taamatut atugaat ukiorpassuannortuni aaqqinnaveersaakkat ilagaat, uffa nalunatigit Qallunaat Nunaannut noorartut atukkat pitsaanerungaarmata uppersaaterpassuarnik peqareersugut nalunaarusiaq IMAK-p torrallataa tamakkiisuunnginnerarlugu oqariartorniarnigaluaq uggornaqaaq.

Kalaallit nunatsinni ukiorpassuarni najugaqaannartartut tjenestemandit qallunaat nunaanni nuugatik nunartsinniiginnartaramik pillagaasarput aningaasarsiatigut ajornerungaartumik inissisimallutik, tamannalu kinguarsaqqinnagu piaarnerpamik aaqqinneqarnissaa Naleqqaminngaaniit sakkortunerpaamik kaammattuutigerusupparput.

Tjenestemandit atugaat nunatsinni ajonerugatik aaqqinnissaat sukkanerpaamik aaqqinneqarlik aammalu utoqqalinersiaqalersimasut allat nunatsinni atugaat ilanngullugit aaqqissuussiffigisariaqarlunnartut Naleqqamiit ilungersuutigisaarlugit alloriarfigisaartut ilanngullugit pitsanngorsaaffiginissaat suliarisariaqartut isumaqarlunnarpugut.

Naalagaaffeqatigiittugut kungeqarfimmiittugut ukiorpassuarni utoqqartatsinnut assigiinngitsumik ilaatigut immikkoortitsiffiusumik aaqqiissuteqarfigineqartarsimasut piaarnerpaamik qimanneqarlutik aaqqiisoqarnissaa Naleqqamiit kaammattuutigerusupparput, tamanna tjenestemandiugalarpata tjenestemandiunngikkaluarpataluunniit piaarnerpaamik immikkoortitsiffiunngitsumik aaqqissuussiffigisariaqarlunnarpoq.



Taamatut utoqqalinersiaqartut atugaat pillugit inissiiniarnermut puigorneqassanngitsut ilagaattaaq nunatsinni utoqqalinersiaqartut pillugit qineqqusaarnermi, maannakkut Naalakkersuisut siulittaasorisaat oqarnikuugaluarmat Qallunaat nunaanniit ajornerunngitsumik, tassalu qallunaat nunaaniittuulli utoqqalinersiaqarneq nunatsinni qinersivimmi uani aaqqinneqassasoq oqariartornikuugaluarmat, naanguku tamakku neriorsuutit. Tamanna pillugu timitaliigani asuli utoqqaat neriorsorneqapiluinnarsimanagerat ajorluinnarpoq, akuersaarneqarsinnaanngilaq allannguisoqartariaqalerpoq.

Tjenestemandinut utoqqalinersiaqalersimasunut naligiinngitsumik atugassaqaqtitaanerup aallavianik tamatumalu kingunerisaanik utoqqartavut tjenestemanditut atorfeqarsimasut, ajoraluartumik amerlasoorpassuit qallunaat nunaannut nuuttariaqartarput aningaasatigut soraarnerussutisiat tungaatigut pitsaanerusement atugassaqaqtinneqarsinnaanertik angujumallugu, ukiopassuit maaneereerlutik ilisarimasat ilaquuttat allaat meeqqatik ernuttatik qimattariaqartarsimavaat aaqqissuussinerit torrallattaanngilluinnartut aaqqinnaveersaarneqarsimammata, tamakkulu piaarnerpaamik aaqqinneqarnissaat Naleqqamiit sakkortuumik kammattuutigissuagut.

Puigussanngilarpulli tjenestemanditut utoqqalinersiaqaleraluarlutik nunatsinniittorpaaloqartarpoq aammalu maannakkut taamaattoqarluni, taakku aningaasarpassuarnik annaasaqarput nunatsinniit pitsaanerusement piumasaaqateqarluta aaqqiisimanninnatta, tamannalu anigorniarlugu ilanngullugu piaarnerpaamik aaqqiigasuartaqarpugut. Nunaqqatigut taamaattut nunatsinnut asanninneq aammalu ilaquutat nalungisat qanigisarerusullugit inissisimasut ataqqinninnerat angeq, aningaasarpassuarnik annaasaqartaraluarlutik nunarput toqqarsimagaat nersugassaapput, taakkulu sivitsorsaqqinnagu utoqqalinersiaat piaarnerpaamik aaqqinneqarnissaat aaqqissuunnissaat, sukkavallaarsinnaanngilaq sukkarnerpaamik piaarnerpaamik aaqqittariaqarlunartut pillugit kaamattuuteqarluta Naleqqamiit siunnersuut taamatut paatsuugassaannngitsumik kippaarissumik manngersumillu oqaaseqarfigaarput

Qujanaq